

# Xroon yuxin tsikjin ndo Pablo xruen en ndo sen ste tjajna Corinto

*Ndo Pablo kjin ndo xroon ngajin sen tjajna Corinto*

<sup>1</sup> \*Jan an, Pablo, apóstol nche e xrée ndo Dio, kuinchena ndo xixi sinta a ixra ngajin Ncháina Jesucristo, jan an ko ndo ndo kichuuna Timoteo ikjinna xroon ji i, xruan anna ngajinnta ti stenta ningue ndo Dio tjajna Corinto ko kaxon kain sen kichuuna titikaon Ncháina Jesucristo ste nchijí nunte Acaya.

<sup>2</sup> Ndotáina Dio ko Ncháina Jesucristo sintanchaonnta ndo ko xrotjáanta ndo juaxruxin.

*Ndo Dio tingijnana ndo nchakon tangi tatsingana*

<sup>3</sup> Juasie ndo Dio, Ndotée Ncháina Jesucristo, tikonóajina ndo ko kain nchakon tingijnana ndo xixi juaxruxin tsinteena.

<sup>4</sup> Je e ndo tingijnana ndo nchakon tatsingana juachjaon, xixi jaña kaxon tsingijnana ikaxin sen kichuuna, nchakon xrojan juachjaon xrochóna sen.

<sup>5</sup> Jan anna tsango ijié juachjaon chondana xranchi juachjaon kuichóna ndo Cristo, ko jaña kaxon xixi je e ndo jajina chondana juaxruxin.

<sup>6</sup> Jan anna tangi stena xixi ja anta xrobake enta juaxruxin. Ndo Dio tingijnana ndo xixi jan anna

tsjachana tsingijnananta kaxon, ko jaña ja anta chao tsatsinganta nge e tangi tson annta xranchi ti tangi tatsinga jan anna.

<sup>7</sup> Ko nónana ixi nduaxin titikaonnta Ncháina Jesucristo, méxin siá jai tangi chondanta juachjaon xranchi jan anna, nónana kaxon ndo Dio tsingijnanta ndo xranchi bingijnana ndo jan anna.

<sup>8</sup> \*Kichuuna, tja onna tsono anta kain nge e tangi kuatsingana ti kuinteena nunte Asia. Tsango ijié juachjaon kuachondana, méxin xraxa onna ndaxrokuen enna.

<sup>9</sup> Jan anna konónana xranchi ndaxrokuen enna nti a. Ti tangi kónana me e juakonana ixi xrochuntia ina ngajin jan onna, xrokonda xrochuntiana ngajin ndo Dio, ndo nchexechón ni tsiken en.

<sup>10</sup> Je e ndo bingijnana ndo kuatsingana kain juachjaon ko ngajin je e ndo chuntiana ko nónana kaxon ixi xratsingijnana ndo.

<sup>11</sup> Ja anta tingijnananta ti nichje enta ndo Dio ixi je e ndo tsingijnana ndo. Ko siá itsjé sen xronichje e sen ndo Dio, jaña kaxon itsjé sen tsajon sen juasaya ngajin ndo ixi je e ndo kuingijnana ndo.

### *Sonda jui a ndo Pablo tjajna Corinto*

<sup>12</sup> Juaxruxin stena ixi nónana ndako junta ana ko xro an ngisen juntaya ana, kaxon ndako junta ana ngajinnta. Ko je a ixi juachaxinnana junta ana jaña. Na i. Juachaxien ndo Dio me e ti bingijnana junta ana jian.

13 Jan anna stekjinna xroon tsaye enta ko ti ikjinna tangi a tsienxinnta ko tja onna ixi tsienxinnta jian

14 ixi jai ja anta ó tienxinnta naanchichjaon, ko nchakon xrokjan Ncháina Jesús tsake enta juaxruxin ixi jan anna jian juntakuan annanta, ko kaxon jan anna juaxruxin stena ixi ja anta jian kuitikaonnta.

15 Jan an xraxa on ixi sa ó xrojuasótsja anta ixi juaxruxin xrokuunteenta ixi ó yuxin xrobikon kichuuna.

16 \*Méxin xraxa on xrojuasótsja anta nchakon saxrokjui nunte Macedonia ko kaxon nchakon xrokjanxinna nti a. Ko jaña ja anta xrobingijnantana saxrokjui nunte Judea.

17 ¿Á xraxaonnta ixi je a jian xraxa on nchakon ndachrjan sa ó ixi xrojuasó nti a? ¿Á xraxaonnta ixi jan an nta a xranchi ngixe i naa chujni ixi sa ó ndachrjan xrojuasó ko tjume e ína i?

18 Ndo Dio no e ixi je a jaña xraxa on xrojuanta a. Nchakon ndachrjan jaán, jaña tson en, ko nchakon ndachrjan na i, jaña tson en kaxon.

19 \*Ixi ndo Silvano ko ndo Timoteo ko jan an juako ananta chijnie ndo Cristo Jesús, chjen en ndo Dio, nchakon bake ena nti a; ko je e ndo Cristo ncheya i ndo; ixi ti ndachro ndo me e nche e ndo.

20 Ixi kain nge e tsichronga ndo Dio sinche e ndo, ndo Cristo kuitikaon ndo ko jaán nche e ndo kain. Méxin, nchakon nichjana ngajin ndo Dio ndachrona “Jaña tson en”, ixi juachaxien ndo Cristo Jesús.

<sup>21</sup> Ndo Dio tingijnana ndo jan anna ko ja anta ixi tsitikaonna ndo, ko je e ndo kuiya ina ndo ixi tjúá tsintee aséeina,

<sup>22</sup> ko me e juako ndo ixi jaina tikinixin enna ndo, méxin, bāke e ndo chji e ndo ngajin jaina, me e Espíritue ndo chóna aséeina ixi jaña tsonoina nduaxin tsayé ena ti ndachro ndo tsajon ndo.

<sup>23</sup> Siá xrata i cha o ixi tjasotsja anta tjajna Corinto xranchi xraxa on, ndo Dio no e ndo ixi je a ixi tjaun a tsjaso. Na i, xrasatji a ixi tjaun a sintani a asáanta ixi tuinxin tjaso.

<sup>24</sup> Je a ixi xroketuan annta xranchi xrochuntianta Ncháina. Na i, ixi ó nóna ixi jian chuntianta ndo. Je o tja onna ixi tsingijnana ícha tsake enta juaxruxin.

## 2

<sup>1</sup> Tjaun a tsoni e asáanta, méxin, ndajuaso a ngajinnta.

<sup>2</sup> Ixi siá tsoni e asáanta, ¿tjume e ngisen xrochjana juaxruxin? ¿Xronkanta ti kondanaxin jan an koni e asáanta?

<sup>3</sup> Méxin, ikjin xroon xruan annta ko juaso a ngajinnta ixi tjaun a xrojuinchení enta aséenna. Jan an tja on ixi nchakon xrojuasó ja anta ko jan anna xrobake ena juaxruxin.

<sup>4</sup> Ko nchakon ikjinna xroon xruan ananta, tsango jitioni e aséenna ko tsjanga kaxon. Ko je a ikjin xroon ixi kaxon xrokoni e asáanta. Na i, jaña junta a ixi tja on xrokono anta ixi tsango tjua anta.

*Ndo Pablo íxraxaon a ndo nge e juinche e naa xi*

<sup>5</sup> Tjaun a ícha xronichja ixi xi juincheni e aséenna, ixi je e xa je a jan on juinchenina xa. Na i. Kaxon juincheni e xa aséen kain ja anta.

<sup>6</sup> Kueyanta nichje enta xa ko koyakutéenta xa, ó chao, íxro an nge e ndachenta xa.

<sup>7</sup> Jai ó nchemé enta ngaya asáanta ti ndako a juinche e xa ko tingijnanta xa, ixi ba kondeexin juachjaon me e tsitjáña aséen xa.

<sup>8</sup> Tinóatána ngajinnta, tjako enta xa ixi nduaxin tjue enta xa.

<sup>9</sup> Xroon sa ó kjin annta ixi tja on tsonóna á nduaxin kuitikaonnta nge e kuetuan annta.

<sup>10</sup> Ko siá ja anta tjáña anta ti ndako a juinche e xa, kaxon jan an ó tjáñana nge e juinche e xa. Méxin, siá xrojan ti ndako a juinche e xa, jan an ó tjáñana me e, ixi ja anta jian tsinteenta. Ko ndo Cristo no e ndo ixi ndatjáñana nge e juinche e xa.

<sup>11</sup> Ko jaña Xixron anxrée xro an nge e sinche e xa ngajin jaina ixi jaina ó nojna xranchi nche e xa.

### *Ndo Pablo bake e ndo tjajna Troas*

<sup>12</sup> \*Nchakon ikjui tjajna Troas ixi xrojuako chijnie Ncháina Cristo, konóna ixi je e ndo kuajon ndo juachaxin xrojuako chijnie ndo nti a.

<sup>13</sup> Ko maski jii juachaxin, jii juachjaon ixi kuitja i ndo kichuuna Tito. Méxin, tuinxin ntatjan sen ste nti a satji nunte Macedonia ko tjume e sakjui.

### *Ndo Pablo tajon ndo juasaya ngajin ndo Dio*

<sup>14</sup> Juasie ndo Dio ixi je e ndo tingijnana ndo ko chondana juachaxien ndo Cristo Jesús. Ko kain ti no tjakona chijnie ndo, ixi ti tjakona xranchi naa nge e chaxro xraxe.

<sup>15</sup> Ixi kain jaina chaxro xraxena xranchi naa tsjoxraxé tajon ndo Cristo tayé e ndo Dio ixi jaina tjakona chijni jian ngajin sen chóna juachaxin tsechón kain nchakon ko ngajin ni xratayé a juachaxin kaxon.

<sup>16</sup> Ngajin ni chóna i juachaxin tsechón, ti chaxro xraxe me e xranchi xrokuenxin na. Ko sen chóna juachaxin tsechón, ti chaxro xraxe me e xranchi tajon juachaxin tsechón sen. ¿Ngisen chao tsjacha sinche e ixra kuetuajina ndo Dio?

<sup>17</sup> Ko jan anna tjancha ina tomi ixi tjakona chijnie ndo Dio xranchi nche e ikaxin na. Na i. Jan anna ixi nchijí aséenana tjakona chijnie ndo ixi je e ndo kuinchanana ndo sinta ana ixra ngajin ndo Cristo.

### 3

#### *Natjúá cha o tsonchjiñe eni ngajin ndo Dio*

<sup>1</sup> Ti ndachrijanna ixi jan anna jian tjakona, ¿á xraxaonnta ixi jan anna tsango ntajíé aséenana?, o, ¿á xraxaonnta xrokondanana naa xroon xronichja ixi jian jan anna?, o, ¿á xrokonda tjancha ananta naa xroon xrondachro ixi jian nta ana ixra, xranchi tjanchia ikaxin na?

<sup>2</sup> Na i, ja anta xrokjuinta xranchi xroon me e, jitjixin ngajin aséenana ko me e tsichuxin chujni ko tsonoexin chujni ti jian nta ana.

<sup>3</sup> Me e tsikonxinni ixi ja anta xrokjuinta xranchi naa xroon chrjiki anna tsikjin Ncháina Jesucristo tsonoexin chujni ixi ixra jian nta ana. Ko je a ixi ndana ó tsikjinxin ndo xroon me e. Na i. Je e ndo kuajon ndo Espíritue ndo ti jichón kuaye enta. Ko

je a ngata a naa xro tsikjin ndo. Na i. Je e ndo tsikjin ndo ngaya aséen chujni.

<sup>4</sup> Ko kain ji i nojna ixi nduaxin titika onna ndo Dio ko ndo Cristo tingijnana ndo.

<sup>5</sup> Ko jua i xrondachrona ixi je o jaina chao sintu una naa ixra. Na i. Ndo Dio, me e ndo tingijnana ko chjaina ndo juachaxin, méxin, chao nche ena xra kuituan an ndo.

<sup>6</sup> Je e ndo chjaina ndo juachaxin ixi sinche ena ixra ngajin ndo ko xra me e naa chijni natjúá juinchéña ndo. Ko chijni ji i je a naa ley jitaxin. Na i. Ji i naa juachaxin kuajon Espíritue ndo Dio. Ixi ley me e teenxin chujni, ko Espíritue ndo tajon juachaxin stechón chujni kain nchakon.

<sup>7</sup> Kondeexin ley bakeexin chujni ko ley me e jitaxin ngata a naa ixro ko tsango ijié chjiixro bika o ley me e, méxin sen israelita jua i tsje e sen ngaya ikon ndo Moisés ixi tsango tóngíxin. Ko ti tóngíxin me e jitjexin.

<sup>8</sup> Siá jaña bikon sen chjiixro me e, jai ícha tóngíxin chijni natjúá kuaye ena ixi juachaxien Espíritue ndo Dio.

<sup>9</sup> Ko ley tsango tóngíxin me e banchekama ijie tsenxin chujni; jai ícha jian ko ícha chaxro chijni ne e ndo Dio tsontjúáxin aséeina ko tsumé e ijie chondana.

<sup>10</sup> Méxin, ti ijié juachaxin kuachóna ley íxro an tjintee xranchi ijié juachaxin chóna chijni natjúá jai.

<sup>11</sup> Siá ley sa ó kuachóna ijié juachaxin ko juachaxin me e yao juexin, jai ícha chóna ijié juachaxin chijni natjúá tsake e kain nchakon.

<sup>12</sup> Ko jaina stechon enna nge e tsjexin a, méxin, xroxrakon ana xronichjana kain ji i.

<sup>13</sup> Ko nta ina xranchi juinche e ndo Moisés, bi-jeexin ndo naa manta ngaya ikon ndo ixi tsikon a sen israelita ixi jitjexin ti jitóngíxin.

<sup>14</sup> Ko sen israelita kuienxin a sen chijni me e ko hasta ti jai ti xranchekuanxin sen nge e kuetuen en sen ó sa ó, xranchi xrochonda sen manta jijeexin ngaya ikon sen ko tienxin a sen ti nchekuanxin sen. Ko je e sen tsienxin sen chijnie ndo Dio je o siá tsitikaon sen ndo Cristo, me e tsitjáña manta tsijijeexin ngaya ikon sen.

<sup>15</sup> Ko ti nchakon jai ti nchekuanxin sen xroon tsikjin ndo Moisés tienxin a sen ixi xrajijexin manta ngaya ikon sen.

<sup>16</sup> Ko nchakon naa ngisen taxi titikaon sen Ncháina Jesús, manta me e ítsingakuen a manta.

<sup>17</sup> Ncháina\* Jesús me e Espíritue ne e ndo Dio. Ko ti no jii Espíritue ndo Dio, xro an nge e tije e.

<sup>18</sup> Ko kain jaina íxro an manta jijeexin ikonna; jaina stena xranchi naa xrosenda tóngíxin ixi tjakona juachaxien Ncháina, ko je e ndo tindoxin ndo ti xraxaonna. Kain ji i ton en ixi ixra nche e Espíritue ndo Dio ngaya aséeina, ko jaña ícha ko ícha stena xranchi jii je e ndo.

## 4

### *Sen chronga chijnie ndo Cristo*

<sup>1</sup> Ixi ndo Dio tsango bikonóana ndo ko chjánana ndo juachaxin sinta ana xrée ndo; méxin, tonchrje ana ko ícha nta ana xrée ndo.

---

\* **3:17 Ncháina** Señor Ncháina Jesús o Ncháina Dio



<sup>2</sup> Xro an nge e imao nta ana, méxin tosuana ina, ko ntaya ina chujni ko tindoxin ana chijnie ndo Dio. Ndo Dio jian no e ndo ixí jan anna nichjana nge e nduaxin, méxin chao xrochuntia sen ngajinna.

<sup>3</sup> Ko ni tienxin a chijnie Ncháina ti tjakona, ni me e tsitjáña nã méxin tienxin a nã.

<sup>4</sup> Ko ni me e tienxin a nã ixí xiña i tetuan an nunte xasintajni tsijije e xa ikon nã ixí tsienxin a nã ko tsikon a nã xranchi tingasáña chijnie ndo Cristo ixí Ndo Cristo naxraje o xranchi ndo Dio xexi ndo.

<sup>5</sup> Nchakon tjakona, je a tjakona ti xraxa on jan anna. Jan anna tjakona ixí tsitikaonnta ndo Jesucristo xranchi Ncháanta, ko jan anna nta ana ixra ixí tsingijnananta ixí tjua ana ndo Jesucristo.

<sup>6</sup> Ko ndo Dio kuetuan an ndo ixí xro i tsingasáñaxin ti naxixe e, kaxon je e ndo juinchen-gasáña ndo ngaya aséeina ixí jaña xrochuxinna juachaxin ijié chónnda ndo Dio, juachaxin tingasáñaxin ngaya ikon Cristo.

### *Ixi chuntiana Ncháina Jesucristo me e jian tso-juna*

<sup>7</sup> Ko cuerponana jii xranchi naa ichi tsikóñaxin ncheta o tjinga nge e tsango tjintee, ixí jaña tsjakoxinna ijié juachaxin chjaina ndo Dio ko je a juachaxinnana.

<sup>8</sup> Maski xrojan nge e tangi tsatsingana, tonchrje ana. Maski xrochondana juachjaon, jan anna chuntiana ngajin ndo Dio.

<sup>9</sup> Maski tengina na, ndo Dio tintuna ina ndo. Maski itsjé nge e nchenana na ixi tjaunna tsjánkana na, jua i sinchetjáñana na.

<sup>10</sup> Ngixe i ti no itjina, tjakona ti tangi tatsingana xranchi tangi juinchekao na Ncháina Jesús ti kuen en ndo, ko ti titika onna ndo jai tjakoxinna ixi je e ndo jichón ndo ngaya aséeina.

<sup>11</sup> Ixi jaina ti stehónna, kain nchakon chondana juaxrakon ixi tsen enna ixi titika onna ndo Jesús, ko kaxon jaña tsjakoxinna ti ijié juachaxin chónnda ndo.

<sup>12</sup> Méxin, jan anna steten enna ko ja anta xrochondanta juachaxin tsarichonnta.

<sup>13</sup> Ixi jan anna xraje o chuntiana xranchi ndachro xroon chijnie ndo Dio tsikjin sen ó sa ó: “Kuitika on méxin, nichja”, ko kaxon jan anna kuitikaonna, méxin, nichjana.

<sup>14</sup> Méxin, noina ixi ndo Dio, ndo juinhexechón Ncháina Jesús, kaxon sinhexechónna ndo jaina, ko tjume e ja anta ko jan anna satsiku una ndo ti tituan an ndo.

<sup>15</sup> Kain ji i kon en ixi jaña jian tsintee ja anta. Ixi siá ícha kueya sen tsayé e sen juachaxien ndo Dio, jaña kaxon ícha itsjé sen tsajon sen juasaya\* ngajin ndo ixi je e ndo chónnda ndo kain juachaxin.

<sup>16</sup> Méxin, tonchrje a aséenana maski jitjexin cuerponana, ndo Dio ícha sinchesoji ndo aséenana ngujngu nchakon.

<sup>17</sup> Ko maski tangi tatsingana ngata a nunte nti i, ji i tsonchrjen a, tuinxin tsatsinga juachjaon ko kondeexin me e, ndo Dio xrochjaina ndo ijié juachaxin ti nai a tsjexin.

---

\* **4:15 juasaya** respeto, honor

<sup>18</sup> Méxin, ta ina juachjaon ixi nge e tangi tatsingana nunte xasintajni, ixi kain me e tuinxin tsatsinga. Ko xraxaonna nge e xratikon ana ixi ti tikonna tuinxin tsjexin ko ti nge e jian xratikon ana nai a tsjexin.

## 5

### *Nchia xrochondana ngajni*

<sup>1</sup> Nojna ixi cuerpojna jii xranchi naa nchia, ko cuerpojna me e tsjexin naa nchakon. Ko ndo Dio juinchekonchjian ndo naa nchia natjúá jii ngajni tsayé ena, ko nchia me e nai a tsjexin nchia ixi je a itja chujni tsikonchjianxin nchia.

<sup>2</sup> Ti xrastena nti i, tsango taabana ixi tjaunna xrochondana cuerpo natjúá jii ngajni.

<sup>3</sup> Ko nduaxin xrochondana naa cuerpo natjúá ko jian sinchekitsáana ndo, je a turuchuna tsinteena nti a.

<sup>4</sup> Ti xrochondana cuerpojna ji i, tsango taabana ko toni e aséeina ko je a ixi tjaunna tsintu ena cuerpo ntaxi. Na i, jaina tjaunna xrochondana naa cuerpo tsen a ixi tsechónna kain nchakon.

<sup>5</sup> Ko je e Ndo Dio juinchéñana ndo ixi tjaun ndo tsayé ena inaa cuerpo natjúá, méxin kuajon ndo Espíritue ndo kuaye ena ixi jaña tsonojna ixi nduaxin tsayé ena nge e tsajon ndo.

<sup>6</sup> Méxin jian chuntiana ko juaxruxin tsinteena ti xrochondana cuerpojna nunte nti i, maski xrasatsji ana ngajin Ncháina.

<sup>7</sup> Ko maski jua i tikonna ndo, jaina chuntiana ngajin ndo.

<sup>8</sup> Ko jaña chuntiana ndo, ícha jian xrokuintu ena cuerpojna ixi saxrokjuina ti jii Ncháina Jesucristo.

<sup>9</sup> Méxin xrokonda ícha sinche ena ti tjaun Ncháina, siá xrastena nti i o na i,

<sup>10</sup> \*ixi kainna xrokonda tsonchjiñe ena ti sinchéñaxin ndo Cristo ijie ixi jaña ngujnguna tsayé ena nge e tikinixinna ixi á jian juinche ena o na i ti xrastena ngata a nunte nti i.

### *Chijni tajon juaxruxin tsinteena ngajin ndo Dio*

<sup>11</sup> Ko jaina ó nojna ixi xrokonda xrochonde ena ndo Dio juasaya, méxin ndachena chujni chijnie ndo ixi jaña je e na tsitikaon na ndo kaxon. Ko ndo Dio ó chuxinna ndo ko kaxon ja anta tja onna jian tsichuxinninta.

<sup>12</sup> Tjaun ana ixi xroxaxaon ja anta ixi tsango jian jan ana. Na i. Je o ndachrjana ji i ixi jaña tsake enta juaxruxin ixi jan ana jian nta ana ko jaña xrochondanta nge e tsjate enta ngajin ni ndachro tsango jian nche e na ko je a nduaxin.

<sup>13</sup> Ixi siá ndachro na tsijinchetjaña janana, jan ana je o tja onna tsajonna juasaya ngajin ndo Dio. Ko siá je a nduaxin tsijinchetjañana janana, méxin tja onna tsingijnananta ícha tsitikaonnta.

<sup>14</sup> Ti tsango tjua ana ndo Cristo, me e tituen en aséenana ko nónana jian ixi je o je e ndo kuen en ndo ixi ti ndako a juinche e kain chujni, méxin jaina xranchi xrokue enna kaxon.

<sup>15</sup> Ko ndo Cristo kuenxin ndo ixi jaina, ixi jaina ti xrostechónna ísinche ana ti tjaunna. Xrokonda sinche ena nge e tjaun ndo ixi je e ndo

kuen en ndo ko xechón ndo ixi jaina xrochondana juachaxin tsechónna kain nchakon.

<sup>16</sup> Jai jaina íxroxraxaon ana á tjintee o na i inaa chujni xranchi kuaxraxaonna sa ó. Ko sa ó kuachuxinna ndo Cristo xranchi ngixe i naa chujni, ko jai í je a jaña chuxinna ndo.

<sup>17</sup> Ixi ngisen titikaon ndo Cristo ikjan sen xranchi naa chujni natjúá ixi kain nge e jointu una sa ó ó komé e ko jai kain nge e ikjan natjúá.

<sup>18</sup> Kain ji i ndo Dio juinche e ndo ixi kuajon ndo chjen en ndo xjan Cristo kuenxin xjan ixi jaina, ko jaña chao tsonchjiñe ena ti jii ndo ko kaxon chjaina ndo ixra ixi xronichje ena chujni chijnie ndo ko jaña tsonchjiñe e ícha chujni ngajin ndo.

<sup>19</sup> Ixi ndo Dio xruan an ndo ndo Cristo kuenxin ndo ixi jaina, ko jaña komé e ti ndako a juinche e kain chujni ko kotuaina ndo ixi jaina tsjakona chijnie ndo ngajin chujni nunte xasintajni ko jaña chao tsonchjiñe e na ngajin ndo.

<sup>20</sup> Jaina chondana juachaxien ndo Cristo ixi xronichjana chijnie ndo ko je e ndo tjanča anta ndo ixi tsitikaonnta chijni tjako annanta. Ko ixi juachaxien ndo Cristo tjanča ananta tonchjiñe enta ngajin ndo Dio.

<sup>21</sup> Ndo Cristo xro an nge e ndako a juinche e ndo, ko ndo Dio bikon ndo xranchi ndo Cristo chónnda ndo ijie, ixi jaña xrokomé e kain ijie kuachónnda chujni ko jaña íxro an nge e sínká na.

## 6

<sup>1</sup> Jan anna xro nta a xrée ndo Dio, tjanča ananta ixi tjáña inta ti jian tjáanta ndo

ko ti tsango tjua anta ndo.

<sup>2</sup> Tsindachro ndo Dio jitaxin chijnie ndo:

Nchakon kuincha anta ja anta, kuin an ti juanchi-  
anta.

Ko nchakon kuajon juachaxin tsechón chujni,  
nchakon me e kuingijnanta.

Ko nchakon me e jai,

jai nchakon ndo Dio sinchemé e ndo ti ndako a  
nche e chujni

ko tsajon ndo juachaxin tsechón na kain nchakon.

<sup>3</sup> Tjaun ana ixi xrojan ngisen xrondachro  
ndakua i nta ana xra, méxin, ndakoa nta ana  
kain nge e.

<sup>4</sup> Kain ixra nta ana tjakoxinna ixi xrée ndo  
Dio nta ana, maski tangi tatsingana ko jan anna  
tokuaxinnana, maski itsjé juachjaon tatsingana  
ko chonda ina nge e xrokondanana,

<sup>5</sup>\*ko kónana na ko xraxin inna na ndo achjiso ko  
tsango itsjé ixra junta ana, ko ste kaxin nchakon  
juine ana ko kuarichrin ana.

<sup>6</sup> Ko maski kain ña juinchenana na, xro an  
ngisen xrondachro ixi ndakua i junta ana ixi  
nónana nge e nduaxin, taka i chjánana juaño, ko  
jian nichja ana na ixi Espíritue ndo Dio jii nga-  
jinna, ko nduaxin tjua ana chujni,

<sup>7</sup> ko ixi juachaxien ndo Dio nichjana chijni nd-  
uaxin ne e ndo, ko nchakon tangi tatsingana, jian  
nichjana ixi jaña tjakoxinna nta ana ti jian.

<sup>8</sup> Kaxin nchakon jian nichja nana na ko ikaxin  
nchakon na i. Kaxin nchakon nichja na kon-  
tranana ko ikaxin nchakon na i. Ko maski

nichjana nge e nduaxin, je e na ndachro na ixi ntayana.

<sup>9</sup> Ko maski kaxin nchakon chuxin ana na ko ikaxin nchakon jian chuxinna na. Ko kaxin nchakon tangi tatsingana ixi tjaun na tsóñana na ko xrastechónna. Tjaya na ngajinna ko xratjacha i na naatsóñaxónna na.

<sup>10</sup> Maski jitoni e aséenana, jan anna juaxruxin stena. Xranchi ni nóa stena, ko tjá ana chujni naa chijni tsango tjintee, ko xranchi xro an nge e xrochondana, ko jan anna chondana kain nge e.

<sup>11</sup> Kichuuna ti stenta tjajna Corinto, jian nichja ananta ko ntatjunanta ti nduaxin nge e jii ngaya aséenana.

<sup>12</sup> Jan anna tsango tjua ananta. Ko ja anta je a nduaxin tjaunnanta.

<sup>13</sup> Tinóatáana ngajinnta, xranchi naa ndotata tinóatée ndo ngajin chjen en ndo, tjeñauninta xranchi jan an tjua anta.

### *Jaina ningue ndo Dio, ndo jichón*

<sup>14</sup> Titexin anta ngajin naa ni titikaon a Ncháina Jesucristo ixi je a naxraje o xraxaonna. Me e jii xranchi kuxinta je a nataonxin nche e ba ixra nchakon ti te ba. Ko jaña kaxon je a naxraje o naa nge e jian ko naa nge e ña i. Ko je a xraje o ti tingasáña ko ti naxixe e.

<sup>15</sup> Jua i tsjento ndo Cristo ngajin Xixron anxrée ko jua i tsekao kichuu naa ni titikaon ndo Cristo ko naa ni titikaon a ndo.

<sup>16</sup> \*Jaina ningue ndo Dio, ndo jichón, ko siá ndo Dio jii ngajinna, jua i tsitikaonna ngajin naa

ídolo, jaína tikinixinna ningue ndo Dio ko je e ndo tsindachro ndo:

Jan an tsake é ko tsajiki an sen,  
ko jan an ndo Dio ne e sen

ko je e sen tsikinixin en sen tjajnána.

<sup>17</sup> Méxin, kaxon jaña tsindachro Ncháina:

Tachrjexinnta ti ste ni titikaon a nã najan an  
ko xro an nge e tjúá i itsenta,  
me e tsake enta ngajin.

<sup>18</sup> Ko jan an Ndotánta,

ko ja anta chjan na, xjan xi ko xjan nchri,  
jaña ndachro Ncháina Dio, ndo chónnda kain  
juachaxin.

## 7

<sup>1</sup> Kichuuna tsango tjua anta, ko noina ixi tsayé ena naa nge e tsajon ndo Dio, méxin, xrokonda tjúá xrochondana cuerpoína ko aséeina, ko tsintu ena kain nge e sinchekitjana, ko jaña xrochonde ena ndo Dio juasaya ko tsitikaonna ndo.

### *Sen kichuuna ste Corinto ó kuindoxin sen*

<sup>2</sup> Taya nananta ngaya asáanta ixi xro an ngisen juntani ana, ko xro an ngisen juntaya ana.

<sup>3</sup> Ndachrjan i ji i ixi sintakamanta ijie. Na i. Ó sa ó ntatjunanta ixi tsango tjua ananta, jai ti xrastechónna hasta tsijija nchakon tsen enna.

<sup>4</sup> Tsango chuntia ngajinnta ko tsango stena juaxruxin ixi nge e nche enta, ko tsango chá nãna maski tangi stena ngata a nunte xasintajni.



<sup>5</sup> \*Xra nchakon juasona nunte Macedonia tjokéna ina ixi nti i, nda a jii chujni ningakonnana ko tsango xronkana.

<sup>6</sup> Ko ndo Dio, ndo tajon juaxruxin tsake e aséenna, kuajon ndo juaxruxin bake e aséenana ixi kuii ndo Tito.

<sup>7</sup> Ko je a je o ixi kuii ndo Tito bake ena juaxruxin. Na i. Kaxon ixi konónana ixi juaxruxin bake e ndo ngajinnta ko ndo Tito ndachijina ndo ixi tsango tjaunnta tsikonnanta ko chronga ndo ixi tsango stechínta ixi nge e juinche enta ko tsango taanta juachjaon ixi jan an. Hora kuin an ji i, tsango bake é juaxruxin.

<sup>8</sup> Ko xroon kjin annta sa ó me e juincheni e asáanta ko jai ya i juachjaon. Ko sa ó jan an kua juachjaon ixi nge e kjin annta ixi konóna ixi nge e ndachrjan juincheni e asáanta kaxin nchakon.

<sup>9</sup> Ko jai ritjén juaxruxin, je a ixi ja anta koni e asáanta. Na i, juaxruxin ritjén ixi ti koni e asáanta me e kuindoxin nge e xraxaonnta ko ti kokuaxin annta ti koni e asáanta me e juinchexruxin en ndo Dio. Méxin, ti kjin annta xroon, xro an ti ndako a junta anta.

<sup>10</sup> Ixi ti toni e aséenni xranchi tjaun ndo Dio me e tindoxin aséenni ko jaña tomé e ijie chónDani, ko ti ncheni e aséen chujni kondeexin nge e jii ngata a nunte xasintajni me e tjacha tóña chujni.

<sup>11</sup> Ja anta kukuaxi annta juachjaon tjáanta ndo Dio, me e juinche e ndo juaxruxin ko jai jian stenta ko jian xraxaonnta ixi jan an xro an ijie chónDa, me e ja anta kuingijnaninta ixi tsango tjaanta juaño ko xronkanta ixi xrojan nge e xrokon en.

Méxin tjaunnta xrobikonninta ko xrojuinchejenganta na ngisen ndako a juinche e ko jaña ja anta juakoxinnta ixi xro an ijię chondanta kondee nge e kon en.

<sup>12</sup> Nchakon kjin annta xroon, je a ixi rixraxa on ngisen ndako a juinche e, ko je a ixi rixraxa on ngisen koni e aséen. Na i. Jaña juanta a ixi ja anta xrojuakoxinnta ngajin ndo Dio ixi tsango kuaanta juachjaon ixi jan ana.

<sup>13</sup> Ko jaña juinche enta, méxin, juaxruxin stena.

Ko ícha bake ena juaxruxin ixi tsango jian bake e ndo Tito ngajinnta ixi ja anta bingijnanta ndo.

<sup>14</sup> Jan an ntatjan ndo Tito ixi juaxruxin stena ixi ja anta juinche enta ti jian, méxin tosuana ina kain nge e ntatjanna ndo Tito. Ko kaxon kain ntatjanna ndo Tito nduaxin me e ko kaxon kain nge e ntatjunanta nduaxin ko jaña stena juaxruxin.

<sup>15</sup> Ndo Tito tsango juaxruxin jii ndo ixi ja anta tsango kuitikaonnta ndo ko kuaye enta ndo jian, méxin ícha tjua anta ndo.

<sup>16</sup> Tsango juaxruxin ritjén ixi nóna chao xrochuntia ngajinnta.

## 8

### *Jian tsingijna kichuuna*

<sup>1</sup> \*Kichuuna, tja onna tsono anta xranchi sen titikaon Ncháina nunte Macedonia juako sen xranchi ndo Dio bingijna ndo sen.

<sup>2</sup> Maski itsjé juachjaon kuatsinga sen, ko maski nóa sen, juaxruxin bake e sen ko bingijna sen xranchi nduaxin xrochóna sen itsjé tomi.

<sup>3</sup> Jan an nóna ixi nduaxin kuajon sen ti chónnda sen ko hasta ti chónnda i sen kuajon sen ixi jaña kuachrxexin aséen sen.

<sup>4</sup> Ko kuinóatée sen ngajinna ixi tsajonna juachaxin tsingijna sen sen titikaon ndo Dio.

<sup>5</sup> Ko ícha tsango bingijna sen; je a xranchi jan anna xraxa onna; sa ó kuitikaon sen ixi nchijí aséen sen ngajin Ncháina Jesucristo, ko tjume e kuitikaon sen ngajinna xranchi tjaun ndo Dio.

<sup>6</sup> Méxin, kuinóatánana ngajin ndo Tito ixi tsja o ndo tomi ngajinnta xranchi juangíxin ndo juinche e ndo ó sa ó.

<sup>7</sup> Jian nóna ixi tsango jian nche enta kain nge e: jian chuntianta Ncháina Jesucristo, jian nchekuen ennta sen chijnie ndo Dio, ícha no anta chijnie ndo, ko tsango chá anta ko tjaunninta. Ko jai ícha jian tingijnanta sen kichuuna.

<sup>8</sup> Je a ritituan annta sinche enta ji i. Na i. Je o tja on tsono anta xranchi tingijna sen kichuuna ngajin ikaxin sen kichuuna, sen ícha nóa, ixi jaña ja anta kaxon ícha tsanginta tsingijnanta ko xrotjue enta sen.

<sup>9</sup> Ja anta no anta ixi Ncháina Jesucristo, je e ndo kuachónnda ndo kain ti tjintee, ko ixi tsango tjua anta ndo, méxin, kuii ndo nunte xasintajni ko ikjan ndo xranchi naa ni nóa ixi jaña ja anta xrochondanta kain ti tjintee.

<sup>10</sup> Ja in xrontatjunta nge e xraxa on ixi ji in. Nano kuatsinga ja anta sa ó kuaxi kuajonnta, ko tsango juaxruxin bake enta ixi kuajonnta.

<sup>11</sup> Jai xratajonta xranchi juangíxixín kuajonnta ó sa ó; juaxruxin tájonnta ti chondanta.

12 Siá tjaunnta tsingijnanta sen kichuuna ixi jaña bake enta ngaya asáanta, ndo Dio take e ndo juaxruxin siá tájonnta nge e chondanta ixi ndo Dio tjanča i ndo nge e chónđa i chujni.

13 Tjaun ana ixi tsingijnanta inaa sen ixi ícha xrochonda sen ko ja anta xrochonda inta. Jan ana tja onna ixi nataonxin xrochondanta.

14 Jai ja anta chondanta, méxin chao tsingijnanta sen chónđa i. Nchéxin tsij nchakon je e sen xrochónđa sen ko tsingijnanta sen kaxon, ko jaña nataonxin tsingijna kichuunta.

15 Xranči ndachro xroon chijnie ndo Dio: “Sen jua o kueya nge e, xro an nge e ti jua o sen xe e, ko sen xro an itsjé jua o, xro an nge e titjáñe e sen.”

### *Ndo Tito ko sen chrikao ndo*

16 Ko juasie ndo Dio ixi je e ndo bake e ndo ngaya aséen ndo Tito yaa ndo juachjaon ixi tsingijnanta ndo xranči jan an kaxon yaa juachjaon ixi ja anta.

17 Ko je e ndo bake e ndo juaxruxin ixi sinche e ndo ti kuetuan ana ndo, ko jai je e ndo tjaun ndo tsiji ndo, tsitsja anta ndo.

18 Kaxon ndo Tito tsijikao ndo naa ndo kichuuna, ko kain sen titikaon Ncháina chúxin sen ndo ixi jian juinche e ndo ixra ti tjako chijnie ndo Dio.

19 Ko kain ni ngo kuinche e sen ndo ixi kaxon tsiki ana ndo nchakon tsjasokianna tomi juakana. Kainna xronta ana ixra ji in, titika onna ko chonda ana ndo Dio juasaya ko tja onna tsono anta ixi nduaxin sinta ana ji i.

20 Ko tjaun ana ixi xrojan ngisen xronichja ixi ndakua i junta ana ixi tomi xraka.

<sup>21</sup> Ko je o tja onna sinta ana nge e jian, ixi jaña Ncháina tsake e ndo juaxruxin ko kaxon jaña tsikon chujni ixi jian nta ana ixra.

<sup>22</sup> Kaxon xruan anna inaa ndo kichuuna tsijikao sen. Je e ndo jian juinche e ndo itsjé ixra. Ko jai ícha tjaun ndo tsingijna ndo ixi tsango chuntia\* ndo ngajinnta.

<sup>23</sup> Xraxaonnta ixi ndo Tito, ndo tjento, tingijnana ndo ixra nta ana ngajinnta. Ko sen yuu tsijikao ndo, sen ni ngo kuinche e sen ixi tjaun sen tsiji sen ngajinnta ko jaña tsajon sen juasaya ngajin ndo Cristo.

<sup>24</sup> Méxin, nche enta nge e jian ngajin sen xruan annta ixi jaña tsikon sen ni ngo kuinche e sen ixi nduaxin tjue é kichuunta ko tsono e sen ixi nduaxin nge e nichjana ixi ja anta.

## 9

### *Tomi xra o tsingijna sen kichuuna*

<sup>1</sup> Ti xra o tomi ixi tsingijnanta sen kichuuna titikaon Ncháina, íxrokonda i xrokjin anta ícha,

<sup>2</sup> ixi sa ó konóna ixi ja anta tjaunnta xrobingijnanta sen, méxin chá na ko ntatjan sen kichuuna ste nunte Macedonia ixi ja anta, sen nunte Acaya, xra nano kuatsinga tjaunnta xrobingijnanta sen nóa. Ko sen kichuuna nunte Macedonia tsango tjaun sen tsingijna sen kaxon ixi ja anta sa ó juako enta sen.

---

\* **8:22 chuntia** tener fe

<sup>3</sup> Méxin, xruan an kaxin sen kichuuna tsiji sen ixi tja on tsikon sen ixi nduaxin ja anta ó stehon ennta ixi tsajonnta nge e tsingijnaxinnta chujni ixi jaña beki a sen.

<sup>4</sup> Nchéxin xrojan sen kichuuna nunte Macedonia tjaun sen tsjasokianna sen ko ja anta xra tjao anta tomi. Ko me e tsosua nana ixi sa ó ndachrjanna ixi ja anta tsango tjaunnta tsingijnanta ko jan anna chuntiana ixi jaña sinche enta.

<sup>5</sup> Méxin, xraxa on ícha jian sa ó xroxruan an sen kichuuna ngajinnta ixi tsingijnanta sen ti xroxra o tomi tsindachronta. Ko jaña tsikonni ixi ja anta tsango tjaunnta tsingijnanta sen nóa ixi tjue enta sen ko je a ixi jan anna tetuan anna sinche enta me e.

<sup>6</sup> Xraxaonnta ixi ngisen tajon a itsjé, kaxon xro an itsjé tayé e sen, ko sen tajon kueya, kaxon kueya tayé e sen.

<sup>7</sup> Méxin, ngujngu ja anta tájonnta nge e xraxaon asáanta, ko sinchenié a asáanta nge e tájonnta ko je a ixi xrokonda tsajonnta, ixi ndo Dio tjue e ndo sen juaxruxin tajon xrojan nge e.

<sup>8</sup> Ixi jaña Ndo Dio ícha sinchenaonnta ndo ko tsajon ndo kain nge e xrokonda anta ixi jaña kaxon chao tsingijnanta ikaxin chujni.

<sup>9</sup> Xranchi ndachro xroon chijnie ndo Dio:

Sen tonchjeya nge e chónnda sen ngajin ni nóa, kain nchakon xroxraon chujni ti jian juinche e sen me e.

<sup>10</sup> Ixi ndo Dio tajon ndo tsee tengani ko tajon ndo nge e sineni, ko je e ndo xrotjáanta ndo kain nge e xrokonda anta ko je e ndo ícha tsajon ndo, me e

xrochondanta itsjé nge e ko jaña tsingijnanta ni nóa.

<sup>11</sup> Ndo Dio xrotjáanta ndo kain nge e tjintee xrochondanta, jaña ja anta kaxon chao itsjé nge e tsajonnta. Ko jan anna tsiki anna tomi me e ko jaña ícha itsjé sen kichuuna tsajon sen juasaya ngajin ndo Dio ixi tomi tsajonnta.

<sup>12</sup> Ixi tomi tsingijnaxinnta sen kichuuna, je a je o ixi sen kichuuna xrochónnda sen nge e xrokonde e sen. Na i, kaxon ixi jaña ícha tsajon sen juasaya ngajin ndo Dio.

<sup>13</sup> Ko kaxon je e sen ícha tsajon sen juasaya ngajin ndo Dio ixi nge e kuajonnta ixi jaña tjakonta nduaxin titikaonnta chijnie ndo Cristo. Jaña kaxon ícha ijié juasaya xrochónde e sen ndo Dio ixi ja anta bingijnanta sen ko ikaxin chujni.

<sup>14</sup> Ko je e sen xronichje e sen ndo Dio ixi ja anta ixi je e sen tjua anta sen ko ixi tikon sen ixi ndo Dio jian tingijna ndo ngajinnta.

<sup>15</sup> Juasie ndo Dio ixi juinchekitoína ndo naa nge e tsango tjintee, me e ti tomé e jíeeni, ko tsikixian ina tsekina kain ti chjaina ndo.

## 10

### *Juachaxin kuajon ndo Dio ngajin ndo Pablo*

<sup>1</sup> Jan an Pablo tinóatáana ngajinnta ixi ndo Cristo, ndo tsango jian ko tsango tjuaína ndo, ste kaxin na ndachro na ixi nchakon ritjén ngajinnta je a ntajié aséenna, ko nchakon ritjén ikjín, tsango tojiena.

<sup>2</sup> Méxin, nchakon tsjasotsja anta tjancha anta nche anta ixi tsojiéna ngajin kaxin ni ndachro ixi

jan anna tja onna tsjachana xrojan nge e, xranchi nche e ni nunte xasintajni.

<sup>3</sup> Nduaxin jan anna stena nti i nunte xasintajni, ko maski jaña, ntai ana ti nge e ndako a xranchi nche e ni titikaon a ndo Dio.

<sup>4</sup> Ko tjaya ina ixi chika, chika tjayaxin chujni nunte nti i. Na i. Jan anna nta ana xrojan nge e ixi juachaxien ndo Dio, ko juachaxin me e chao tjankaxinna kain xr̄a nche e Xixron anxrée.

<sup>5</sup> Ko jaña kaxon tjankana ixr̄a nche e ni tjaun a ixi íkaxin chujni tsichuxin n̄a ndo Dio. Ko ixr̄a nta ana ixi kain ni chón̄da ijje tsindoxin n̄a ti ndakua i xraxaon n̄a ko tsitikaon n̄a ndo Cristo.

<sup>6</sup> Ko jan anna tsuyakutéena chujni tsitikaon a ndo Cristo ixi jaña tsitikaon n̄a ndo, ko jaña kainnta jian tsitikaonnta kaxon.

<sup>7</sup> Ja anta je o titikaonnta nge e tikonnta. Ko ngisen xraxaon ixi nduaxin tikinixin ndo Cristo, tsono e sen ixi kaxon jan anna tikinixinnana ndo xranchi sen me e.

<sup>8</sup> Siá tsango nichja ixi richonda juachaxin tsituan an, tosuana i. Ncháina Jesucristo chjána juachaxin me e ixi jaña ícha xrochuntianta ndo, ko je a ixi me e tsitjáñaxinnta.

<sup>9</sup> Ko ti kjin annta xroon xruan annta, tjaun a xroxraxaonnta ixi me e xroxronkanta,

<sup>10</sup> ixi ste kaxin sen ndachro sen ixi ti ikjin xroon tsango toña o ngajinnta, ko nchakon ritjén ngajinnta xronkana ko kain ti nichja tjinte a.

<sup>11</sup> Ko ngisen jaña nichja, tsono e sen ixi ti nchakon ikjin xroon xruan annta ko ritjén a ngajinnta, jaña kaxon tsjasotsja anta naxraje o xronichj̄a anta xranchi ikjin xroon xruan annta.



<sup>12</sup> Nai a xroxaxa onna ixi tsango jian nichjana xranchi ste ikaxin n̄a jaña nche e n̄a. Kaxin chujni xraxaon n̄a ixi je e n̄a tsango tjintee n̄a ko ikaxin n̄a noe a n̄a, ni me e tsango ninta xraxaon n̄a.

<sup>13</sup> Kaxon jua i sintajié aséenana ixi nge e nta ana. Ndo Dio me e ndo xrondachro nge e sinta ana ko ngajin ja anta sinta ana ixra me e.

<sup>14</sup> Jua i ntaxruantana ixi ícha tituan ana, ko chao xrondachrjan ixi jan an sa ó juaso ngajinnta ko juako anta chijnie Ncháina.

<sup>15</sup> Ko jua i sintaxruanta ixi jan an junta a ixra juinche e inaa ngisen. Jan ana tja onna ixi ícha xrochuntianta Ncháina, jaña jan ana ícha sinta ana ixra ngajinnta ko je o ti tsituannana.

<sup>16</sup> Kaxon tja onna tsjakona chijni jian ne e Ncháina Jesucristo íkaxin tjajna ti xraxro an ngisen itji tjako ixi jaña xro an ngisen xrondachro ixi jan ana ntaxruantana naa xra tsijinche e inaa ngisen.

<sup>17</sup> Ko siá xrojan ngisen tjaun sinchejié aséen, chao sinchejié aséen sen je o ixi titikaon sen Ncháina Jesucristo.

<sup>18</sup> Ixi ndo Dio nichja ndo jian ixi naa ngisen ndako juinche e ko chao a ixi xrojan ngisen je o sen sinchejié aséen sen ixi ndachro sen jian nche e sen.

## 11

### *Ndo Pablo ko sen nduaxin a apóstol*

<sup>1</sup> Tja on tsin ennta nge e xrondachrjan maski xronichja xranchi naa sen ninta.

<sup>2</sup> Ndo Dio nchenóna ixi tsaxinta juachjaon ixi tja on tsintue anta ndo Cristo. Jan an ó ntatjan ndo

Cristo ixi tsaya anta ndo xranchi naa nchrichajan tsixranchia ixi tsute e ko tjúá aséen ko cuerpoe nchrichan ixi tsii nchakon tsute e nchrichan ngajin naakua naa ndoxi e nchrichjan.

<sup>3</sup> Ko xronkana ixi xranchi kunchee tsango ña i juincheye e ba jan Eva; ko ba jaña sinchekachruenta ba ti xraxaonnta ko ti jian titikaonnta ndo Cristo.

<sup>4</sup> Ixi siá tsii xrojan ngisen tjako inaa ndo Cristo, ko inaa espíritu ko inaa chijni ti je a juako jan anna, ja anta tintu enta ni me e nche e ña ti tjaun ña ko me e ja anta nta anta juaxruxin.

<sup>5</sup> Ko jan an je a ícha nuntena ixi ni ndachro apóstol ña, ni nandá kuji, ni ndachro ícha tjintee, ni rué e ja anta.

<sup>6</sup> Ko maski je a ícha jian nichja jan an, nduaxin ícha nóna chijnie ndo Dio ko ó itsjé vez juako anta ixi ícha nóna.

<sup>7</sup> ¿Á ndako a junta a jan an nchakon juako chijnie ndo Dio ngajinnta ko juanchia i ninaa tomi ngajinnta?, ko juntajié a aséenna ixi jaña ja anta ícha xrokuiteenta.

<sup>8</sup> Ko jan an kuayá a tomi chjána sen kichuuna, sen jii ikaxin ni ngo, ko tomi me e kondana ixi juntakuan an ja anta.

<sup>9</sup> \*Ko nchakon bake e ngajinnta, xrokondana tomi, ko xro an nge e juanchia anta. Ko kain nge e kondana, sen kichuuna nunte Macedonia chjána sen ixi tjaun a kuajondaxin ixra ngajinnta ko jaña jai tsajonndaxin a xra ngajinnta.

<sup>10</sup> Ko jian nóna ixi chuxin chijni nduaxin ne e ndo Cristo, ko xro an ngisen nchijí nunte Acaya

tsantsjena juaxruxin chonda.

<sup>11</sup> ¿Sonda ndachrjan ja in? ¿Áixi tjaun anta? Ndo Dio no e ndo ixi tsango tjua anta.

<sup>12</sup> Ko xrajaña sinta a tsjanchia i tomi ngajinnta ixi tjaun a ixi jaña ni nduaxin a apóstol sinchejié aséen nā ixi stencheye e nā chujni ixi je e nā ndachro nā tikinixin en nā ndo Cristo ko xraje o ixrā nche e nā xranchi jan anna.

<sup>13</sup> Ni me e je a nduaxin apóstol nā. Je e nā stencheya nā ixi ndachro nā tikinixien en nā ndo Cristo.

<sup>14</sup> Ko kain ji i sinchexronka ina ixi nojna ixi kaxon Xixron anxrée ndachro xa ixi je e xa naa ángel tingasáña ko je a nduaxin.

<sup>15</sup> Jaña kaxon ni nche e xrée Xixron anxrée ncheya nā ixi ndachro nā jian xrā nche e nā. Ko nchakon tsjexin kain nge e, tangi tson en nā ixi ndakua i juinche e nā.

*Tangi ton en ndo Pablo ixi ixrā apóstol nche e ndo*

<sup>16</sup> Íjngo ntatjunta: Tjaun a xrondachronta ixi juintatjáña jáana, ko maski jaña xrokon en, tintunanta xronichja ixi jaña chao sintajié aséenna naa nchíín.

<sup>17</sup> Siá jaña ntajié aséenna naa nchíín, ndachrjan i ji i ixi juachaxien Ncháina. Na i. Jaña jan an ndachrjan xranchi xrokjui nduaxin xrojuinchetjáña jáana.

<sup>18</sup> Ste itsjé ni nchejié aséen ixi nge e no e nā, ¿sonda jua i kaxon jan an sintajié aséenna?

<sup>19</sup> Ko ja anta ndachronta ixi no anta ko juaxruxin taye énta ni nduaxin tsijinchetjáña jaa.

20 Ko ja anta tokuaxinnta tituan annta na ko ntajinta anta na ixra ko tjenga inta na na, tantsja anta na nge e chondanta, ntaya anta na, ko tande e na itun ngaya ikonnta.

21 Maski tosua na jan an xrondachrjan ixi jan anna junta ina jaña.

Ko ti nchejié aséen na, jan an kaxon chao sintajié aséenna, ko ndachrjan ji i xranchi naa ni tsijinchetjáña jaa.

22 Je e na chujni hebreo na. Kaxon jan an. Je e na chujni israelita na. Kaxon jan an. Je e na kuachrjenixin na ndo Abraham. Kaxon jan an kuachrjenixin ndo Abraham.

23 \*¿Á je e na nche e na ixra ngajin ndo Cristo? Jan an nduaxin nta a ixra ngajin ndo Cristo, maski je a jian jan an xrondachrjan. Jan an ícha junta a ixra, jan an ícha bija na na ndo achjiso, jan an ícha bikaon na ko itsjé vez ndáxrokon enna.

24 Na ó vez ni judío juaya na ngajin; ikántena kóñana na ixi ino.

25 \*Níi vez ni tituan an tjajna Roma juaya na ngajin ixi ntasé, naa vez kuaxina na ixro. Níi vez konunte ntabarco ngangí nda, ntabarco ritiki an, naa vez naa tiie ko naa nchakon bake é jan on ngusine ndachaon.

26 \*Íkjín no kuaji. Tangi kuatsingatu a ndajitinga, ko naa nchakon ngakona xiche e. Kuatsinga itsjé juachjaon ngajin ni tjajnána ko kaxon ni je a tjajnána, ko kaxon ti bakji tjajna, ntajie ko ndachaon ko kaxon xrokóñana na, ni nduaxin a titikaon Ncháina Jesucristo.

<sup>27</sup> Tsango junta a ixra ko itsjé nge e tangi kónna. Itsjé tiie kuarichrin a jian ko itsjé nchakon kuatse jinta, kuen enna inda ko kuachóna i itsjé manta tsaria, méxin tsango bakongína.

<sup>28</sup> Ko maski kain ji i kónna, nai a tjáñana ixi kain ni ngo ko ngujngu nchakon tsango kua juachjaon ixi kain sen xra o ni ngo.

<sup>29</sup> Ngisen toni e, ko, ¿á jan an tonina í? Nchakon xrojan ngisen nche e naa nge e ti ndakua i ngajin sen kichuu sen, taa juachjaon ko toña o.

<sup>30</sup> Siá chao sintajié aséenna, sintajié aséenna ixi soji ana.

<sup>31</sup> Ndo Dio, Ndotée Ncháina Jesucristo, ngisen tikinixin en kain juasaya,\* no e ndo ixi nduaxin nge e ndachrjan.

<sup>32</sup> \*Nchakon bake é tjajna Damasco, xi baketuen en nti a, xi rey Aretas, kuetuan an xa ixi xrotséna na hora tsachrjexin tjajna ko xrobikaana na ndo achjiso.

<sup>33</sup> Ko sen kichuuna juankayana sen ngaya naa ntaxrakaxro ko juinchexingajinxinna sen ti jii naa ventana jichóna tjatu o jii ngandajin tjajna, ko jaña sabinga ko ítsé ana na.

## 12

### *Nge e ijié bikon ndo Pablo*

<sup>1</sup> Xro an nge e tjachani xronichjani ixi jian je eni. Maski, xrokonda xronichja ko tseki anta nge e bikon ko nge e juinchenóna Ncháina Jesucristo.

---

\* **11:31** *juasaya* respeto, honor    **11:32** Hch. 9:23-25.

<sup>2</sup> Chuxin naa xi titikaon Ncháina ko chónnda tenoó nano ikjui xa ti nínxin ngajní. Nóna i á cuerpoe xa o aséen xa bikon ko ixi juachaxien espíritue ndo Dio. Je o ndo Dio no e nge e nduaxin kon en.

<sup>3</sup> Ko nóna ixi xi me e ikjui xa; nóna i á ixi cuerpoe xa o na i; je o ndo Dio no e ndo.

<sup>4</sup> Ndo Dio bikao ndo xa ngajní, nti a kuin en xa kaxin nge e tienxin ani ko xro an ngisen chónnda juachaxin xronichja me e.

<sup>5</sup> Jan an xrojuintajíe aséenna ixi chuxin xi me e, a kondee nge e junta a jan an, jua i sintajíe aséenna, je o chao xrondachrjan kondee nge e tangi kónna.

<sup>6</sup> Siá xrojuintajíe aséenna je a ixi juintatjáña jáana. Na i. Ixi nduaxin nge e jian junta a ko sinta i me e ixi tjaun a xroxraxaon sen ixi ícha nóna. Na i. Cháña je o syntaxraxa on sen nge e nta a ko nge e tin en sen ti junta a.

<sup>7</sup> Ixi ti bikon, ti juakona ndo Dio, tsango chaxro me e, méxin tsango xrojuintajíexin aséenna. Ko sinta i me e, ixi kuayá a naa íchin ntau na ko xinhexrée Xixron anxrée tsango ncheni e xa ntau na ixi jaña sintajíe a aséenna.

<sup>8</sup> Méxin ó ní juanchia a Ncháina Jesucristo tsantsjena ndo íchin me e,

<sup>9</sup> ko Ncháina ja in ndachijina ndo: “Xro an nge e ícha xrokonda a; je o ti tsango tjua a, ixi ti tsango ijíe juachaxin chonda jan an, ícha tonoxin juachaxin nchakon naa chujni ícha soji a. Juachaxin chónnda jan an tonoxin nchakon jua i nche e naa nge e ja ua.” Méxin, juaxruxin tsake é nchakon soji ana ixi jaña ícha juasaya tsayé e Nchána Jesucristo.

<sup>10</sup> Ko méxin, ícha juaxruxin ritjén nchakon

soji ana, nchakon chujni tjakaxin na ngajin, nchakon xro an nge e chonda, nchakon tengina na, nchakon yaa juachjaon ixi kondee Nchána Cristo; nchakon soji ana, nchakon me e ícha tonsoji aséenna.

*Ndo Pablo taa ndo juachjaon ixi sen kichuuna tjajna Corinto*

<sup>11</sup> Ndako tsijintatjáña janáa nchíin ixi nichja nge e jian junta a. Ja anta chondanta ijie ixi ja anta xrokonda jian xronichjanta ixi najan an. Ko jan an je a ícha nuntena ixi xi apóstol kuin-tekii, xi ja anta nta anta juaxruxin rue énta, maski jan an xro an tjinteena.

<sup>12</sup> Ti konchrje ana junta a ixra ngakjen ennta ko kain ixra ijié ko kain ixra chaxro junta a ixi juachaxien ndo Dio ixi jan an nduaxin naa apóstolna.

<sup>13</sup> Ko kain ja anta nge e ti ícha juntanuntenta ixi íkaxin sen kichuuna jii ikaxin ni ngo, ixi sen jaán bingijnanana sen. Ko jan an tjaun a bingijnaninta ixi tjaun a xrokuajonntaxin xra ngajinta. Tjáña anta ti ndako a junta a ixi juanchia inta xrobingijnaninta.

<sup>14</sup> Jai ó richon an ixi tsjasotsja anta nínxin vez ko jai kaxon tsajonndaxin a xra ngajinta ixi jan an tjée a tsayá a tomianta. Na i. Jan an tjée ja anta ixi ja anta ícha tjinteenta. Ixi je a ichjan tjatsin in xjan tomi tsayé e ndotée xjan. Na i. Ndotata me e ndo xrokonda tsjatsi in ndo tomi tsayé e xjan.

<sup>15</sup> Ko jan an tsango ijié juaxruxin chonda ixi sintexianxin tomina ixi ja anta, ko jan an kaxon,

maski ícha taka tsondaxíina, ixi sinta a ixra ngajinnta ixi jan an tsango tjua a asáanta, ko maski jan an ngujngu nchakon ícha tjua anta ko ja anta ícha tjaun antana.

<sup>16</sup> Ko maski kaxin sen ndachro sen ko titikaon sen ixi jan an kuajondaxin a xra ngajinnta ko ikaxin sen me e kaxon ndachro sen ixi jan an tsango nóna ntaya me e imao kuantsja anta tomi-anta.

<sup>17</sup> ¿Ájuintaya anta nchakon xruan annta xrojan ngisen tingijnana?

<sup>18</sup> Nchakon ntatjan ndo Tito xrokuijitsja anta ndo, je e ndo ko inaa ndo kichuuna, ndo Tito, ¿ájuintaya anta ndo? ¿Ánduaxin a ixi kayui jan anna xraje o jian ixra nta ana ko xraje o Espíritue ndo Dio nta axinna xra?

<sup>19</sup> Ja anta stexraxaonnta ixi jan anna nichjana ja in ixi tja onna ja anta xroxraxaonnta ixi jian jan anna, ko je a nduaxin me e. Na i. Jan anna ja in nichjana ko ixra rinta ana jitikon ndo Dio ko Ncháina Cristo, kain me e nta ana ixi tja onna ícha tsitikaonnta Ncháina Cristo ixi tsango tjua ananta.

<sup>20</sup> Jixronkana ixi nchéxin nchakon tsjasotsja anta, stenze anta xranchi jan an tja on ko kaxon ja anta já sinta inta juaxruxin xranchi xronichja jan an. Nchéxin stetetoku u kichuunta, tochjuya anta nge e chóna inaa sen kichuunta, stetoñao e kichuunta, stenzejeje asáanta, stetjakaxin kichuunta ko stenzeke to kichuunta.

<sup>21</sup> Jixronkana ixi nchakon tsjasotsja anta, jan an tsango tsosua na ngajinxin\* ndo Dio ko xrots-

\* **12:21 ngajinxin** delante de



janga ixi kondaxin ja anta ixi xratintue anta kain ti ndako a kuanche enta, ti chondanta nchri je a janchri anta ko xi je a ndoxi anta.

## 13

### *Juexin kuetuan an ndo Pablo*

<sup>1</sup> Jai ó nínxin vez tsjasotsja anta. Xraxaonnta nge e ndachro chijnie ndo Dio: Kain nge e tsochjian xrokonda tsake e yuu o ní sen bikon nge e kon en.

<sup>2</sup> Ó sa ó ntatjunta ko jai íjngo ntatjunta maski ritjén a ngajinnta, ja in tsikjin ngajin sen ndako a nche e ko sen kaxin ixi ti nínxin tsjaso jai tsango tsoñao a sen ndako a nche e.

<sup>3</sup> Ko nduaxin ja anta tjaunnta tsono anta á nduaxin nichjā jan an ixi juachaxien ndo Cristo. Je e ndo nduaxin tsoñao ndo ko nduaxin sintaña anta ndo ijie.

<sup>4</sup> Je e ndo juako a ndo juachaxien ndo ti kuen en ndo nganito ntacru, ko je e ndo jichón ndo ixi juachaxien ndo Dio, jaña kaxon jaina kuasoji a aséeina, ko jai juasie ndo Dio ixi juachaxien ndo, kainna stechónna ko nta ana ixra ngajinnta.

<sup>5</sup> Xraxaonnta, ¿á chao stenta?, ko, ¿á nchijíi asáanta chuntianta Ncháina Jesucristo? O, ¿á tonoa inta ixi ndo Jesucristo jii ndo ngajinnta?, o, ¿á nduaxin a kuaye enta ndo ngaya asáanta?

<sup>6</sup> Ko tja on tsono anta ixi nduaxin jan anna titika onna Ncháina Jesucristo.

<sup>7</sup> Tjancha ana ndo Dio ixi xro an nge e ndakua i stenze enta ko tjaun ana ixi xrondachrjanna ixi jian juentakuan annanta. Na i, jaña ndachrjanna

ixi tja onna sinche enta ti jian maski xrondachro ikaxin nã ixi jan anna je a jian juakona.

<sup>8</sup> Jan anna xro an sinta ana ixi tsomé e ti nduaxin. Ko kain nge e sinta ana me e ícha tsichuxin-nta ti nduaxin.

<sup>9</sup> Tsango chá nãna ixi ja anta xraxaonnta ixi jan anna soji ana, ko ja anta tsango sojinta. Ko jan anna tjanča ana ndo Dio ixi ja anta ngujngu nchakon ícha jian tsitikaonnta ndo.

<sup>10</sup> Méxin, ja in kjin annta jai ti ritjén ikjín ixi nchakon tsjasotsja anta xrokonda i ícha tsuyakutéenta. Ixi jan an chonda juachaxin, juachaxin chjána Ncháina, ko juachaxin me e xrokonda tsingijnaxinnta ixi ícha tsitikaonnta ndo ko je a ixi sincheni e asáanta.

<sup>11</sup> Jai kichuuna, take énta juaxruxin, tingijna kichuunta ixi jian tsinteenta, naxraje o xraxaonnta, tetókui a kichuunta ko ndo Dio, ndo tsango tjaunna ko chjaina juaxruxin, tsake e ndo ngajjinta.

<sup>12</sup> Chje é kichuunta juajna ko kainnta chonde enta kichuunta juasaya.

<sup>13</sup> Kain sen titikaon Ncháina ste nti i xruan annta sen juajna.

<sup>14</sup> Juachaxien Ncháina Jesucristo, ti tjua anta ndo Dio ko juachaxien Espíritue ndo tsake e ngayá asáanta kainnta. Jaña tson en.

**Chijnie ndo Jesucristo  
Popoloca, San Luís Temalacayuca: Chijnie ndo  
Jesucristo New Testament**

copyright © 2016 Wycliffe Bible Translators, Inc.

Language: Popoloca, San Luís Temalacayuca

Contributor: Wycliffe Bible Translators, Inc.

All rights reserved.

2020-12-01

---

PDF generated using Haiola and XeLaTeX on 18 Apr 2025 from source files  
dated 29 Jan 2022

ee37a138-f1b9-51ef-b60f-e89d6de4d06f